

#ichbinsophiescholl

David Truttmann/FMR

Tgi che crai che las medias socialas sajan fatgas mo per derasar tut il plunder da quest mund, quel e quella sbagliant. Instagram, Facebook e cumpagnia pon trasora esser instructivs. Perquai datti oz quest tip – però i dovrà in excurs:

Dumengia, ils 9 da matg 2021, avess Sophie Scholl già ses anniversari da 100 onns. Ses destin tragic: Ella è morta cun mo 21 onns. En quella vegliadetgna è ella numnadamaain vegnida stgavazzada dals Nazis. Ella aveva cumbattì, ensemes cun auters students da Minca, la dictatura nazista. Sut il num «Weisse Rose» avevan els derasà fegls sgulants, en ils quals els propagavan resistenza cumplecta encunter Hitler. Durant in'acziun per derasar fegls sgulants en l'universitat, il favrer 1943, è Sophie Scholl vegnida arrestada. Ils Nazis han fatg curt process cun ella, cun ses frar e cun in auter ami. Quatter dis suenter l'arrestaziun èn tuts traïs cumpogns vegnids executads cun la guillotina. Tant en furma condensada l'istorgia tragica da Sophie Scholl.

E tge ha quai da far cun las medias socialas? A chaschun da ses 100avel di da naschientscha han ils dus chanals tudestgs SWR e BR lantschà in account dad Instagram cun il hashtag #ichbinsophiescholl. Sin quel chanal raquinta Sophie Scholl – giugada da l'actura svizra

Luna Wedler – da sia vita durant ils davos diesch mais da vita. Sa chapescha èsi uschia ina vista bunamain banala, fitg preschenta e subjectiva. L'actura filmescha las scenas per part perfin en modus da selfie. Ins la vesa a far party cun ses amis, ella «posta» fotografias cun sia sora Inge u ses frar Hans – insumma, ella mussa la vita «normala» dad ina giuvna. Be a l'ur datti gia pitschens indizis da la repressiun nazistica.

Insumma, l'istorgia vegn a canticuar sin Instagram durant ils proxims mais, di per di, enfin tar sia arrestaziun il «proxim» favrer. Da chattar sin #ichbinsophiescholl.

* Di per di dat ina redactura u in redactur da la FMR in tip a lecturas e lecturs – in cussegli u ina recumandaziun, senza garanzia che quel tip plaschia lura.